

四庫全書

史部

欽定四庫全書

史部

平定兩金川方略卷二

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方畧卷一

乾隆二十年乙亥六月癸卯

上諭內閣曰開泰著補四川總督新任大學士黃廷桂著調任陝甘總督將川督應辦事務交明開泰即赴肅州

己巳四川總督黃廷桂提督岳鍾璜奏言四川打箭爐外孔撒麻書兩土司本屬嫡堂叔侄近以遠年舊事爭競構釁其金川及綽斯甲布係麻書親

戚革布什咱德爾格忒上瞻對中瞻對係孔撒親
戚互相袒護發兵助勢據泰寧協副將張天德稟
稱金川綽斯甲布各遣頭人帶兵數千忽至孔撒
嘉齊山將百姓碉房燒燬又將革布什咱丹東官
寨及格羅斯納喇嘛寺圍住攻打革布什咱土司
遣人至明正土司處請兵助守明正土司甲爾叅
得沁派兵五百名前往防禦革布什咱復差人赴
小金川鄂克什求援臣等思川西一路土司內惟金

川聲勢最大人更狡悍而小金川鄂克什三離谷等均為微弱打箭爐外西南一帶土司內惟綽斯甲布人戶最多而革布什咱霍爾甘賓布拉克底巴旺亦俱弱小今既經革酋遣人赴小金川鄂克什明正各土司請兵助守自應聽其遵照前此一家有事彼此救援之盟出兵協助臣等即令明正土司多派土兵前赴革地幫同防守并於泰寧協內酌派二三百名迅往打箭爐駐劄以安往來貿易

易漢番人之心並恐明正既出土兵爐地不無單
弱又諭木坪土司甲爾叅納木卡即撥土兵五百
名就近赴打箭爐協同明正土司防範并令小金
川鄂克什梭磨卓克采從噶克各量已力發兵應
援一面差派幹弁馳赴各土兵對壘之處諭以聽
候剖斷毋得私行攻擊奏入報

聞

臣等謹按金川賊番本以狼貪之性肆其凶橫

乾隆十三年十路大兵進討靈擊森馳勢如危
卵經畧固請掃巢而

皇上如天好生仍本叛討服舍之經貸其誅磔未及數
年而輒以援助麻書為名侵擾革布什咱地方
其意蓋以革布什咱為霍爾部中一大土司設
計併吞則金川橫亘於甲壘霍爾諸部之中其
間如巴旺布拉克底等豈能不受其箝制從此
各土司皆可恣其吞噬賊酋等垂涎已久故此

次曉諭解散後旋復於二十三年攻圍吉地馴
至三十六年則乘小金川攻鄂克什之時遂戕
革布什咱土司攘其室而據其地向非我

皇上赫怒興師勦絕其命則金川搏擊跳梁何所不至
必且勢等燎原恣行蠶食矣

七月己亥黃廷桂奏言竊臣前差標弁往赴綽斯
甲布面見其酋工噶諾爾布再四曉諭該酋隨將
圍困革布什咱格羅寺土兵撤兵惟攻擊丹東之

兵尚在未回第金川及綽斯甲布番人為德爾格
忒所傷亦衆其勢漸已就衰旋據工噶諾爾布遣
其頭人阿結赴省求見稟稱土司因革布什咱與
德爾格忒俱係孔撒親戚合兵侵擾麻書且格羅
寺地方為綽斯甲布住打箭爐貿易之地從前革
布什咱縱人搶奪併需上稅抑勒不堪是以發兵
攻擊惟求從公剖斷不敢不遵臣與岳鍾璜諭以
爾係

天朝受印土司宜知王法即有不平惟當靜俟審斷今擅自發兵已為有罪本督等仰體

皇上愛養番人之意是以遣官往諭不即興兵誅勦爾土司已撤格羅之兵且來具稟似屬尚知悔罪今再分諭金川德爾格忒及爾綽斯甲布三處土兵各自安穩歸巢毋久遷延觀望至於孔撒麻書之事自當別遣大員剖斷明晰其格羅寺既係爾等貿易之路將來酌駐官兵彈壓革布什咱土人自

不敢妄行劫奪阿結合掌叩頭感悅而去今新任督臣開泰雖抵省城而各土兵尚未解散臣遵

旨暫行辦理並告開泰以此等蠻觸相爭只宜分防邊隘遣派幹員排解使其互相牽制就我鞭箠必其冥頑倔強妄肆鴟張斷非口舌所能開導始宜請

旨酌派一旅之師痛加殲戮不必定掃其巢已足使各番共凜懲創臣將如何分割及將來善後事宜會同督提二臣籌酌妥協再行赴

關奏入

諭曰覽奏俱悉祇可如此辦理

臣等謹按金川肆行跋扈怙惡不悛巧命未幾
旋又復侵害革布什咱此真黃廷桂等所云冥
頑倔强妄肆鴟張者是即發兵征討實所應得
乃恭奉

諭旨猶以蠻觸相爭派員排解只可如此辦理仰見

皇上深戒佳兵務期息事寧人以綏絕徼直至逆酋

固跳梁實為各土司大患然後除暴取殘俾絕
域共安食息

大聖人兵以義動出於萬不得已蓋天下皆可共信也
十月丁巳黃廷桂開泰岳鍾璜奏言金川綽斯甲
布德爾格忒三處土兵於八月十四五日各回本
處至麻書土司登波瓦布年僅十二奔逃之餘不
肯遽出臣等委令懷遠營都司宋元俊出口差弁
至下瞻對綽沃地方始行尋見惟德爾格忒頭人

帶兵將麻書官寨佔住又於九月初九日差弁前
抵麻書將德爾格忒土兵驅令出境遂將麻書土司
安置官寨查德爾格忒乃甘資以下最大土司附近
青海接連革地部落繁多巢穴險遠自雍正元年
投誠父子弟兄承襲三世歷來效順臣等選派弁
員晏勲王吉等馳往德爾格忒先賞予大緞綢綾
等物以安其意繼以麻書乃受印土司如其有罪
天朝自當誅戮豈容各土司擅計并吞自應仍安本地

其掠去麻書百姓亦應逐一交出聽候官斷以破
其迷該土司魯珠布甲木錯遂領頭人於九月二
十三日親赴甘賓求見宗元俊傳集孔撒麻書并
金川綽斯甲布革布什咱綽沃白立章谷瞻對各
頭人將孔撒麻書爭控原案從公分斷均無異辭
復使宰牛瀝血頂經立誓共敦和好永無殘害其
麻書百姓逃在甘賓投在孔撒及被德爾格忒掠
去者均各送還共計三千九百餘名量加撫卹交

付麻書土司管束其孔撒被兵逃難之民共一千
三百餘名口亦併招回仍歸孔撒土司撫卹安插
至此次起釁之由因有孔撒喇嘛徹木本投入麻
書藏匿致啓兵端飭令拘解省城收禁永杜亂源
又以麻書土司年幼酌派弁兵十餘名以資保護
又革布什咱格羅寺既係金川綽斯甲布赴打箭
爐貿易之地亦派把總一員帶兵往駐以資彈壓
臣等訪知魯珠布甲木錯本係喇嘛其兄策楞衮

布又屬達賴喇嘛妹夫臣等將定案原委札致駐藏副都統薩拉善舒泰轉告達賴喇嘛令其發信勸導德爾格忒土司嗣後務使孔撒與麻書常相和睦不得教唆生事自玷清規致與達賴喇嘛顏面有關將來書信一至德爾格忒土司自必益為妥帖至金川郎卡差大頭人策楞促勒池木到省臣等責其首先動兵之非及被德爾格忒擊敗逃回轉致麻書受害即爾等攻圍革布什咱至於數

月徒見損傷初無絲毫獲利今麻書土地民人仍

賴

天朝安插不惟現在復還所有并可長享太平可見

天朝撫馭土司扶弱抑強必無偏向嗣後爾等惟當各

守疆界一心住牧勿再生事取災該頭人聆聽之

下叩頭伏罪稟稱此次我等實在感激回去將曉

諭之言告知郎卡自必實心遵奉其革布什咱土

司色楞敦多布因臣等傳令各土司派兵應援又

檄撤金川綽斯甲布攻圍之兵差其頭人信濟爾
結來省叩謝臣等諭其告知土司嚴守卡隘勸令
孔撒務與麻書和睦各安生業如再教唆生事必
致自貽伊戚該頭人亦叩頭領諭而去此案夷務
全經完妥臣黃廷桂即於十月初九日馳駟赴京
奏入報

聞

乾隆二十三年戊寅四月乙丑開泰岳鍾璜奏言

金川革布什咱比因結親攜釁而革布什咱番衆
潛附金川致將土司色楞敦多布及小金川土司
之子僧格桑共土兵三十餘人趕入吉地官寨圍
攻臣等譯寫番諭飛飭金川令將番兵速撤毋得
擅自攻擊復令副將陸天德前在打箭爐駐劄彈
壓一面派署遊擊楊青都司夏尚寅守備王智酌
帶土兵分往章谷泰寧等處相機排解一面諭令
鄂克什雜谷各土司派兵分助小金川防範又分

兵赴革布什咱救援又委候補守備溫欽把總袁國璉前往綽斯甲布駕馭該土司出兵攻擊使金川不能專力於革布什咱然後可以徐為剖斷嗣據川西川南文武各員稟報金川所困吉地攻打甚急急意在必破革布什咱草地番民十有七八多為金川脅誘並據金川郎卡稟覆總以向小金川報仇為詞不肯即退臣等查色楞敦多布係受印土司而僧格桑係小金川土司之子自不可聽其

殘害倘落於金川之手諸難辦理嗣據溫欽等稟
稱前抵綽斯甲布據該土司工噶諾爾布自稱金
川欺我實多我已派土兵一千五百名前往革布
什咱之格嘉塔地方截斷金川歸路如遇有金川
之兵自當出力打仗又據楊青具稟已將革布什
咱格藏一帶番民招撫又據夏尚寅等具稟小金
川土兵一千名已由革布什咱進發格藏沙中等
處番民業俱收服金川聞信退至丹東焚燒官寨

將色楞敦多布之母及其祖母並其叔庸中旺嘉
勒帶同遁去吉地之圍已解等語臣等思金川土
兵之退蓋由小金川土兵突至而格藏沙中等處
番民棄邪歸正且聞各土司皆幫兵助戰是以倉
皇遁走然受創未深而革布什咱地方大半殘損
且僧格桑出圍之後即率土兵回去恐色楞敦多
布勢難孤立正在諭令該管文武各員轉諭該土
司修整卡隘加意招集番民以資防守旋據副將

陸天稟及楊青等飛稟三月初十日金川暗同布拉克底及庸中旺嘉勒復帶兵二三千四路圍攻丹東吉地色楞敦多布以獨力難支遂於十一日先經移住沙中十五日又以沙中番民單弱同妻小金川之女阿什諾奔赴泰寧懇求安插其革布什咱之地仍為金川佔踞臣等伏思庸中旺嘉勒為人原與色楞敦多布平時不合是以依附金川倒戈相向而革布什咱番衆復因素怨阿什諾致

為金川所誘今色楞敦多布已不能保其故土革
布什咱地方密邇明正自應急為籌辦臣等飭令
文武各員分諭革布什咱土司親戚及會同盟誓
之各土司量力幫助色楞敦多布一面調發雜谷
土練五百名同梭磨等土兵往駐丹壩又調土練
五百名同明正木坪等土兵往駐章谷泰寧以壯
聲勢併調雅栽邊各協營共馬步兵二百名齊赴
打箭爐駐劄彈壓又以革布什咱番衆雖被金川

誘附其中如有可以招撫者設法撫諭勿致終為
金川所用一面嚴諭郎卡曉以利害速將番民撤
回倘該酋等藉詞支飾竟欲併吞非言語所能化
誨必須另為籌計容臣等再行奏

聞酌量辦理奏入

上諭軍機大臣曰向來番苗自相攻擊原可不必繩以
內地官法此次金川與革布什咱興兵構怨原不過
因結親起釁情形本與蠻觸無殊惟所奏分撥土練

彈壓射箭爐等處一節未甚明晰該地係通藏之道
如止巢穴中自相劫掠於射箭爐有何干涉但開泰
岳鍾璜素非好事之人其所陳奏慮其偏於息事斷
不致過於張皇果使該酋之意不專在革布什咱將
為遑圍滋擾伊等別有訪聞踪跡必須徹底辦理據
實速奏候朕另行降旨然此非可以專恃川省綠營
弁兵及畧派土練便可濟事也再綽斯甲布現與小
金川鄂克什諸土司聯絡兵力不為單弱或諭知該

土司果能自出其力懲創金川則所得地方人衆不妨量賞伊等以示鼓勵以番攻番之策亦屬可行若事在必不可止則該督等轉當以無事處之一切不露而密籌二三千兵數月之糧一面奏聞請旨朕自相機酌辦若就現在委員曉諭約束便可寧輯則又不必多此一番布置

臣等謹按僧格桑在革布什咱猝破金川圍困正如腐鼠孤豚危在旦夕幸得

天朝檄令各土司發兵救應并派內地之兵遙為聲援
金川惶懼始撤吉地之圍遁回巢穴乃僧格桑
既歸故地不思存活之恩力圖効順而轉潛與
金川蛇蟠蟻結反噬鄂克什土司駸駸及於明
正此實為天理所不容所以

皇師深入巢穴旋傾雖思駢走偷生而卒為金川毒死
函首藁街所謂自作孽不可活者此之謂也

五月丙戌開泰岳鍾璜奏言據駐劄章谷泰寧各

委員稟報革布什咱地方除沙中一處外其餘皆
為金川所據布拉克底土舍德祖從中附和遂將
吉地丹東官寨及格藏等處卡隘分兵把守勢甚
鴟張並揚言欲攻巴旺及小金川又郎卡曾遣頭
人番民二十餘名赴打箭爐投遞文書回時在明
正地方縱放夾礮殺傷人口因被明正土司拿獲
拘禁郎卡挾嫌欲與尋釁又莎羅奔郎卡屢次向
地方官具稟以伊女先嫁革布什咱革地應該伊

女掌管意圖吞佔臣等思革布什咱界連明正土
司若為金川久據則不惟巴旺及小金川勢頗危
迫即明正亦須時加防範殊為阻礙番性頑劣既
非言語所能速化而伊等互鬪之事又未便遽用
內地兵力臣等詳細籌計惟有駕馭各土司令其
以番攻番並招撫金附金川之革布什咱番眾仍
復歸心舊主庶幾易於就緒因即指示各委員設
法籌辦茲據叅將本進忠等稟報革番頗齊格戎

原屬先經招撫茲令密赴革地招引番衆已有巴
拉格藏達卜桑裕卜桑各處頭人願為內應適明
正所屬之章谷土千戶安慶因恨金川揚言尋釁
情願進攻於三月十七日率其土兵五百餘名會
同頗齊格戎前往十八日巴旺土司發兵五百五
十名將格藏裕卜桑攻奪已與章谷土兵會合又
安慶所招之革布什咱番衆合同章谷土兵攻開
卡隘四處金川布拉克底之兵均經奔竄又據溫

欽等稟綽斯甲布派兵直赴革巢奮力攻擊金川
番兵焚燒吉地官寨退守等語臣等查章谷及綽
斯甲布兩處土兵殺傷金川二百餘人擒獲數十
人革布什咱之地全行收復第聞金川番衆尚在
布拉克底不無窺伺而革布什咱兩經侵擾已多
殘破該處實為明正及打箭爐藩籬若不為之及
時料理色楞敦多布力弱無能終難固其巢穴臣
等令綽斯甲布土兵量留數百與明正土兵分布

革地以資防範並派幹員帶領色楞敦多布歸巢
撫番番衆所有要緊卡隘速為修整俟堵禦有資
再將綽斯甲布等土兵逐漸減撤至綽斯甲布及
小金川已與金川仇怨甚深聞欲互相約會盡力
攻打金川臣等飭令委員妥為辦理如果從此結
局毋令滋釁不已至布拉克底土舍德租不安住
牧既經附和金川侵擾革布什咱且欲借仗金川
之力以吞併伊家巴旺土司若不設法剪除將來

革布什咱巴旺仍屬可虞臣等已諭各委員密察
情形遇有可乘之機或以力擒或令鄰近土司擊
取務期夷疆寧謐倘一時不能應手即暫為安頓
別作緩圖奏入

上諭軍機大臣曰金川所據革布什咱官寨既經明正
綽斯甲布等土司全行奪回可見蠻番挾仇攻擊之
事原所時有殊不必以內地官法繩之該處文武果
能曉諭約束可以寧輯固屬甚善否則惟有以番攻

番之一策惟須靜鎮以處之耳金川原屬不安分之
土司若衆土司等能協力除之而分其地於番境轉
可久遠相安正不必以滋釁不已為慮第此等機宜
自不便於明諭宜密飭文武各員微示其意於衆土司
俾其知所從事至於布拉克底土舍德租不安住牧
竟敢附和金川其情甚為可惡必應示以懲創該督
提等或以計擒或令鄰近土司攻取亦可以酌量辦
理著一併傳諭之

乾隆二十四年己卯四月乙酉開奏言金川與
革布什咱構釁以來綽斯甲布小金川丹壩等土
司俱各出兵攻擊金川屢次挫衄冬間因巒雪甚
大仍在相持未經對敵今據章谷委員稟報金川
土司差其頭人額斯恭投稟臣詳譯稟內言詞郎
卡雖有畏懼乞憐之意但番情狡黠難以遽信且
綽斯甲布小金川丹壩各土司與之結怨已深未
便即為和解臣與提臣岳鍾璜公同酌議現在姑

為駕馭山雪漸融再為相機辦理奏入

上諭軍機大臣曰各土司互相攻擊業令該督等相機辦理不必繩以內地官法看來革布什咱等與金川相持不下不過欲衆分金川之地即卡盤踞金川終非善策如果能協力瓜分正可聽其自然所謂以番攻番之一策也摺內所稱郎卡頗有畏懼乞憐之態向來番情狡黠萬不可以憑信轉致事端即山雪消融之後其委員往彼察看再行辦理之處亦無容稍

涉張皇惟在該督提等察訪該管文武得其情實相機辦理一切行所無事以靜鎮處之再各土司文書大概係用唐古特之字該處繙譯恐不能盡其詳細一併傳諭該督等嗣後接到各土司文書除一面辦理外即將原文進呈即此次該土司文書如尚未發還即速馳奏則彼地情形自無不洞悉矣

臣等伏查甲壘霍爾諸部咸奉喇嘛之教是以往來文牒多用唐古特書第川省提督衙門雖

皆設有譯字房而綠營書識大率不通文義且
於繙譯更屬粗疎即有狡獪番情何從體察自
奉

諭旨將原文進呈重加音譯然後其間細微委折一一
可見

坐照如神之下因此指示機宜更無不洞中竅要而軍
營得遵循辦理用能克著掃犂其所裨於邊情
軍務蓋非淺鮮也

閏六月己卯開泰岳鍾璜奏言梭磨卓克采從噶克丹壩皆係雜谷分派梭磨土舍前於雍正七年授為副長官司乾隆四年加授安撫司卓克采土舍於乾隆十四年授為長官司嗣將雜谷改土歸流另於從噶克設立土司一員授為長官司與梭磨卓克采及丹壩土舍分管地方番衆臣等伏查丹壩土舍策旺恭順出力凡於地方文武所行事件俱能小心遵奉且於金川接壤地方率同梭磨

等土兵實意進攻甚為出力查校磨卓克采從噶克三土司乃維州一帶藩籬丹壩地在西南又為三土司門戶由丹壩再向西南數十里則係綽斯甲布金川交界該處界連數土司策旺以一土舍介乎其間未免有不能自固之見且該土舍恒慮年歲已老身係土舍並無職銜子孫未必能世守而梭磨卓克采從噶克三土司亦以丹壩未有印信恐其心志不堅臣等仰懇

聖恩撫念該土司向化有年賞授長官司頒結印信號
紙俾得子孫世守則策旺感戴

皇仁自必倍加恭順即梭磨等土司本係一家勢同居
齒亦必共為悅服奏入得

旨勅部議奏兵部奏覆應如該督提等所請
上從之

平定兩金川方略卷一

欽定四庫全書

平定兩金川方略卷二

乾隆二十五年庚辰七月十一日癸丑開泰岳鍾璜奏言金川土司莎羅奔原以喇嘛承襲土職其地方一切事務係姪郎卡管理節據副將保懷智同知崔鑰報稱莎羅奔於本年五月十一日病故查金川與革布什咱接壤以來如綽斯甲布小金川丹壩巴旺各路土司卡隘曾派土兵逐處堵截

迄今一載有餘金川未敢稍為闖出向各土司多
事臣等漸次將各路土兵已減撤一半餘俟查看
情形另為酌辦再巴旺土舍德祖向來駐劄布拉
克底聘娶金川之女為妻名為結親實為金川箝
制該土舍亦已患病身故其所娶金川之女生有
一子甫經數月所有土舍事務係德祖之兄安多
爾暫為管理臣等飭諭該管文武各員察訪安多
爾是否仍與金川勾結隨時具報並令轉飭巴旺

聞

土司等仍將各卡隘加意防範毋稍疎懈奏入報

乾隆二十六年辛巳四月初四日癸丑開泰岳鍾

璜奏言

臣

等細核金川番民本為有限茲各土司

四面圍攻男丁輪防碉卡婦女背運口糧迄無休

息上年莎羅奔又已病死郎卡自知力弱勢孤稟

懇遣人前往當面稟話臣等飭差把總陳起龍抵

其巢穴該處番民俱焚香迎接據郎卡前後稟稱

大率以伊本

天朝土司惟與衆土司不和衆土司因將不法之事向
內地父母官前控告如今止求作主剖斷伊惟恪
遵分付絲毫不敢多事等語臣等思金川與革布
什咱構釁本不過穴中互鬪惟因金川狡黠性成
恐其得寸思尺是以不可不加懲創今各土司圍
堵兩載有餘郎卡既不獲逞其吞併之謀而且數
經挫衄稟求剖斷若仍令各土司駐兵攻守既不

能尅日奏功轉恐日久生懈詳悉熟商復委諳練員弁前赴綽斯甲布丹壩金川一帶會同各土司所遣大頭人宣揚

恩德切指郎卡罪惡明白剖斷將金川在丹壩界土所修碉卡押令逐一拆毀侵佔丹壩山地全數退還并差員弁前赴布拉克底令將金川所助番兵悉回巢穴然後傳知各土司將各處土兵及土練次第撤收惟是革布什咱兩被金川蹂躪殘破良多

而巴旺毗連布拉克底人少力單尚須彈壓仍留
弁兵十餘名在革布什咱巴旺中間章谷地方駐
札以為聲援昨綽斯甲布丹壩革布什咱巴旺小
金川鄂克什梭磨卓克采從噶克九土司以土兵
均撤陸續遣人赴省請安臣等以郎卡為人狡詭
斷不可信乃爾土司頭人等所共悉目下雖已竣
事仍當時刻留心不可墮其詭計最後郎卡亦遣
人來臣等嚴行教誡諭以

天朝之于土司正如雨露之于草木本無二致自己向
順即享安全自己作孽即受災禍惟郎卡自擇之
頭人又稱上年莎羅奔已死郎卡懇求換給篆文
印信臣等復諭以郎卡只見有罪未見有功即使
分當承襲亦應照例取其各土司印結由地方官
詳報請

題方能換給印信頭人又稱郎卡因莎羅奔之死欲
遣人赴藏熬茶求給路票臣等復諭以熬茶本係

善事郎卡應遣大頭人虔誠預脩將隨去人數若干報知該管地方官轉稟核辦該頭人俱敬聽領諾而去至前此所需犒賞臣等會同奏請將總督及布政使養廉各借支半年於邛雅文灌等州縣購買餘茶酌量行銷所獲茶價除歸還借支之數餘息銀兩作為賞需今除已經動支及扣還借支外尚餘六七十金發支打箭爐及雜谷兩處各二千兩購買穀麥青稞貯倉脩用餘銀仍存藩庫以

為夷務之需奏入報

聞

臣等謹按郎卡既以各土司攻圍浹歲畏罪懼
誅自當先遣大頭人赴地方官衙門輸誠哀籲
乃敢請遣人前往當面稟話已露驕縱之狀而
開泰等不加斥責即令弁員往赴其地此等微
末員弁宣示諸番既不能詞嚴義正而郎卡狡
猾異常從此窺見封疆大吏早存苟且完事之

心豈能震懾威援永遠不侵不叛邇年大兵進
討屢次

勅令軍營將士毋得稍通言語示之不測蓋知番人情
性狎之則玩絕之則懼深得夫懾魄攻心之術
是以賊人之狡詐無所施而大兵之聲威愈以
震也

二十七日丙申開泰岳鍾璜奏言乾隆十二年有
金川土舍旺嘉勸係郎卡同父異母之弟首先投

誠十四年補授裡塘額外副土司其後漸與該處
正副土司不睦臣等乘其有欲赴打箭爐之語即
令在爐城居住時金川已與革布什咱構釁臣等
復以打箭爐逼近革布什咱聲息易通遂令押赴
泰寧協駐劄之化林坪交副將等收管該番自抵
化林坪小心慎畏甚屬守分本年二月赴省來見
臣等思金川革布什咱夷務現已告竣若將該番
遣回裡塘該處既有正副土司轉成贅設日久亦

不無掣肘而裡塘遠隔邊外照料難周臣等會同商酌請將旺嘉勒即安插化林坪仍將裡塘每年應得額外土司養贍照數撥給在旺嘉勒隨營居住既得俯仰寬然而與該副將同在一處自不難於照料且使各番知歸順者獲享安全更為有益至布拉克底土舍德租已死其兄安多爾接管地方聞金川即原配德租之女塔朗改配安多爾未幾塔朗病故金川復將原配韋布什咱土司之女

納木初改配為妻據該管文武訪知安多爾舊有
足疾現在加甚雖兩娶金川之女皆勉強而後從
實非所願屬下番民尤不樂與金川聯絡臣等仍
諭該處員弁隨時體察不得以夷務已竣遂為忽
視奏入報

聞

乾隆二十七年壬午二月十一日乙亥開泰岳鍾
璜奏言各處土司承襲例應取具隣封土司悅服

甘結隨本送部惟是金川土司素稱獷悍自乾隆二十三年侵擾革布什咱而綽斯甲布小金川疊次出兵助勦久已不與往來若因其襲封之故照例行取隣封甘結轉多未便臣等斟酌辦理現今該管文武將郎卡請襲一案毋庸行取甘結奏入上諭軍機大臣曰開泰等奏金川襲封土司毋庸取具隣封土司甘結意在直捷簡便所見亦是然不為郎卡等明白宣諭恐郎卡不知懷畏轉疑開泰等有意

遷就一似徇其所請竟不待各處甘結者然或致日
生驕縱殊非控馭之道著開泰岳鍾璜即行曉諭即
卡等謂隣近土司與爾素有嫌隙若因承襲之事照
例取結伊等定不樂從今據爾懇求竟免其輟轉取
結以示嘉惠之意但襲職之後如或妄思滋事在隣
境諸部斷不能相協而封疆大臣亦斷不肯為此稍
貸方足令其做惕於體制亦為允協

十一月十七日乙亥開泰岳鍾璜奏言丹壩逼近

金川地方偏隘金川勾其一二頭人背叛土司為之引路本年九月初十日半夜突然攻圍官寨緣平時尚有預備竭力抵禦金川緣途搶掠進至瑪讓地方佔據據副將保懷智同知崔鑰稟報前來臣等飛行該文武各員催飭各土司速派土兵往助以遏鴟張又恐所派土兵遠近不等未能克期齊集先撥屯練二百名赴援以揚聲勢又據各員稟報綽斯甲布地連丹壩一聞有事土司工噶諾

爾布即發土兵救應已將瑪讓奪回賊人退據山
梁各處土兵陸續漸集等語臣等思丹壩新設土
司地僅彈丸本非金川敵手但現在既有土練又
有各處土兵卽卡必不能得志臣等嚴檄詰責卽
卡復委守備溫欽千總袁國璉馳往查辦如該酋
遵奉檄責卽將丹壩山梁退還則查明滋釁緣由
尚可酌量剖斷倘該酋支吾觀望意圖吞并或添
派土兵或再派土練設法辦理奏入

上諭軍機大臣曰開泰等奏郎卡滋擾丹壩現飭守備溫欽等詰責查辦一招未免先事預設調停之見於辦理機宜未能領會該督等前於乾隆二十三年奏金川與革布什咱有結親構釁之事明正綽斯甲布兩路進攻屢經傳諭不必懲以官法惟有以蠻攻蠻之一策或令綽斯甲布小金川分據其地而彼時開泰岳鍾璜不能體悉朕旨未免意存姑息但取解紛了事以致養成驕縱此時郎卡初為土司即已垂涎

丹壩其明驗也殊不知此等狼子野心即使目前詰責認罪又安能保其永遠受約安靜乎如司內如革布什咱丹壩等類其力之強弱雖殊然皆可借此以為郎卡之敵如果因其挾仇攻擊竟將郎卡勦滅豈非策之最善者著傳諭開泰等斷不可有先事部署官兵協力援助之計致涉張皇所有隣近土兵既集或即協力勦除分有其地正可聽其各自為計番境轉可相安倘各土司不能併力勦除而郎卡仍怙惡

不悛有必須另行辦理者則亦非該督提等以川省
綠營官兵所能任其事聞秦等臨時據實奏聞候朕
酌辦此時只須靜以聽之不可調派紛紜徒擾番人
觀聽也

臣等謹按滿洲勁旅忠勇兼著而吉林索倫之
兵并能登高越險所向無前進討兩金川實非
旗兵不能得力恭讀屢降

諭旨以未可專恃川省綠營所能任其事厥後掃蕩逆

巢俘擒雜種多繫旗兵之力克歲大勲仰見

聖天子燭炳幾先雖數千里外十數年後無不洞如觀

火云

乾隆二十八年癸未三月初三日庚申開泰岳鍾

璜奏言前據綽斯甲布革布什咱均欲攻打金川

懇求幫助業經臣等檄諭獎勉以示鼓勵嗣據丹

壩小金川巴旺梭磨卓克采從噶克各土司均請

助勦金川並遣頭人到省

臣

等傳見該頭人等諭

以汝等土司因郎卡肆行不法意欲出兵助勦為
汝等各土境永遠除害實當如此辦理汝等土司
惟在同心合力認真攻擊

天朝自當從厚加恩各土司不論誰家苟能攻得地方
搶獲人口物件即行給賞如或將來別須攸助之
處亦必隨時酌助當遣該頭人等各自回巢去訖
現在丹壩地方有綽斯甲布革布什咱等各土兵
及土練協同堵禦金川自知為衆所惡將所據丹

壩山梁連築石碉十餘座且於各土司交界處所
嚴為防守第綽斯甲布革布什咱及小金川巴旺
丹壩雖均與金川為仇內惟綽斯甲布實為金川
勁敵臣等密諭委員令其駕馭綽斯甲布一俟山
雪消融彼此會商相機勦擊能攻則進否則俟其
少懈遣放夾壩使金川不獲寧居並諭凡通金川
之路毋令番人私行貿易鹽茶等物查金川所恃
以跳梁惟在地形險阻其實不過彈丸即其可用

番民亦止在五干上下如以各土司之力與之輟
轉角觸雖其間強弱不齊未必克期深入然使四
面堵禦無路可通且須不時備敵勢必久而自困
並將各土司隨時犒賞以資鼓勵查乾隆二十三
年臣等奏請購買餘茶即以所獲利息為夷務之
需今餘銀尚存司庫仰懇賞給應用奏入報

聞

六月十二日戊戌

上諭內閣曰開泰庸懦無能種種謬誤深負簡任著革職賞給頭等待衛前往伊犁辦事四川總督著鄂弼補授是月十六日壬寅又

諭內閣曰鄂弼現在病故四川總督員缺著阿爾泰補授

七月二十七日壬午開泰岳鍾璜奏言郎卡請擾丹壩綽斯甲布等九土司并請攻勦金川臣等查九土司內綽斯甲布革布什咱小金川巴旺丹壩

俱與郎卡挾有嫌仇至梭磨卓克采從噶克鄂克
什相距金川較遠別無仇隙誠恐諸酋心力不齊
臣等疊次委員數加飭諭各酋俱遣頭人赴綽斯
甲布處會議九土司中與金川聯界者各派土兵
即從各處進攻其與金川隔遠者出兵分助期於
五月二十九日同時並舉并求官兵應援懇賞鹽
菜口糧大藥鉛彈臣等諭以郎卡並非敢於干犯
內地汝等欲為丹壩報仇并除將來貽患乃汝等

自為之事何得擅請官兵至鹽菜口糧等項本俱不應賞給但念汝等素常恭順且此舉亦屬鋤強之意除官兵并鹽菜銀兩不准外如或口糧火藥鉛彈不足尚可量為酌賞至土司內有能攻取地方已許即行分管實於汝等有益務須實力為之不可曠時觀旋據該管文武報稱綽斯甲布分兵三路小金川分兵三路均於是日進攻金川於小金川綽斯甲布所攻之地防守綦嚴連次對敵各

有所傷未能得地至丹壩一路卽卡佔據山梁欺
其人少且又難於仰攻防守稍懈丹壩因與梭磨
卓克采從噶克土兵繞出作固頂普籠籠二處之
後分兵攻襲將金川擊敗遂據其地並奪取凱立
葉山梁石卡均有所獲又據南路稟報布拉克底
地方俱有金川番人代為防守茲於六月十七日
革布什咱地方攻破瓊山下洛爾察地方巴旺土
兵於扎科搶得牛隻殺傷布拉克底探哨之兵兩

土司正在添兵合進臣等查布拉克底逼近金川互相唇齒今攻布拉克底即無異於攻金川現在設詞鼓勵俾各土司互為聲援伺隙攻取奏入

上諭軍機大臣曰開泰等奏九土司攻打金川所辦尚未得窺要開泰向於郎卡遣人赴省時每許進見常加慰撫而陰縱綽斯甲布等攻擊在郎卡素性狡黠此等行為豈能掩其耳目甚非天朝開示誠信駕馭番夷之道郎卡既於綽斯甲布等屢肆欺凌衆土司

能合力報復原不為過督臣既聞其事惟應明白
宣示綽斯甲布等以郎卡既得罪於衆土司爾等悉
銳往攻倘能勦滅番巢亦免爾等後患但不必官為
援應而於郎卡來人嚴為拒絕且切諭以爾既結怨
隣境誰肯甘心為爾蠶食必將聯集各寨奮力復仇
此亦爾所自取我等斷不肯曲為庇護如此則郎卡
既不敢恃以逞強而綽斯甲布等亦可洩其積忿於
事理方為兩得乃開泰既用譎以籠絡郎卡復隱為

援助各土司殊失控制大體阿爾泰嗣後一切當以
光明正大經理得宜毋事調停遷就致蹈開泰故習
并將此傳諭岳鍾璜知之

九月初九日癸亥阿爾泰岳鍾璜奏言臣阿爾泰
抵任後據西路各員稟稱綽斯甲布土司於七月
十六日派令駐劄穆克土舍帶兵潛赴金川地方
金川不及隄防綽斯甲布土兵搭梯上頂餘各旁
列夾攻殺死金川數人二十日金川番人一百十

餘名潛至綽斯甲布俄坡嘉覺地方寨內男婦放鎗用石奮力擊追又被駐守俄坡土兵截殺共殲斃四五人又小金川土司於七月二十三日探得金川納庸木城防守稍疎派兵進攻金川堵禦不及棄城遁逃被小金川趕殺割取耳記二件又七月二十七日鄂克什土兵隨小金川進攻金川功噶爾拉途遇金川放哨番人擊斃六人割取耳記一件並據委員等稱郎卡於各處添修碉卡防守

甚嚴各土司亦添設築卡以為防範偵探有隙可乘即為攻襲奏入報

聞

十月初六日己巳阿爾泰岳鍾璜奏言自本年五月二十九日各土司會攻金川分路進剿各土司有得勝回寨者亦有互相殺傷者核計搶殺金川人數以及焚毀碉卡郎卡殊為受創其南路巴旺於七月二十三、四、五、六等日發兵攻打布拉克底

碉卡木城勦殺二十餘人又金川於七月二十六
日夜間有二三百人將綽斯甲布榮薩碉卡圍困
放火焚碉內土兵放鎗擊拒綽斯甲布土司復
經撥兵救援殺死金川番人十二名又八月十四
十六十九等日綽酋撥兵攻擊金川巴扎古一帶
燒燬寨房一所殺死番人八名于八月二十四五等
日綽斯甲布土兵於金川占古樹林內埋伏捉獲
大頭人一名打傷二名又小金川土司於八月初

八九等日聚集土兵一千七百餘名暗襲金川之
曾巴什古地方燒燬大碉四座割獻首級六顆耳
記二十六件又鄂克什土司於八月初六日撥兵
二百名到金川德納地方政打互有殺傷又於曾
巴什古地方捉獲番人二名詢知金川亦於初八
九等日帶兵千餘暗攻小金川之美卧溝牛廠小
金川土舍星夜分兵前往截殺金川敗遁呈獻首
級十七顆耳記十四件俱經委員等查驗屬實臣

等復飭委員詳諭綽斯甲布及小金川等九土司
爾等會攻經川自圖報仇洩憤以除後患各宜努
力進攻並飭委員如遇郎卡遣人投稟嚴為拒絕
且諭以郎卡孽由自作

天朝斷不肯曲為庇護如此駕馭則郎卡既不敢逞強
而土司亦得以洩憤第查番地雪霜甚早交冬則
積雪連山難於攻擊恐各土司日久懈生郎卡轉
得乘隙滋事臣等惟有剴切曉諭妥協駕馭以堅

其志奏入報

聞

十二月二十七日巳酉阿爾泰岳鍾璜奏言據西路委員報稱綽斯甲布頭人帶兵二百潛赴金川達巴轄羅等處擊死金川番人六十餘名又綽斯甲布與金川連界之嘉木貝山設有土兵駐守候被金川四五百人圍住攻打綽斯甲布土兵合力迎拒金川番人中鎗傷斃者三四十人又綽斯甲

布派兵百名乘夜暗赴金川之保格諾爾殺死五
人割取耳記三件並獲刀矛等物又據報稱九月
十一十五等日丹壩於博嚕古地方蓋修碉座金
川番衆來攻經丹壩土兵連於碉內放鎗擊死六
人丹壩隨將大碉修起以資守禦又據報稱梭磨
卓克采從噶克各土司頭人約會潛赴金川博迪
喇嘛寺上下放鎗攻擊打死三十餘人又據報稱
革布什咱土兵由正地一路攻金川之普斯智溝

夜半潛赴卡內殺死三人擒獲男婦共四名又據
報稱金川及布拉克底番人由額多山下來到巴
旺幹蘇地方圍攻碉寨幹蘇防兵正與對敵時有
額勒圭防守望見號火奔見并截金川歸路而巴
旺土兵與明正魯密土兵亦俱過河救援將金川
布拉克底番兵擊敗死傷甚衆現在土司地方山
有積雪難以進攻各回碉寨自守查九土司內惟
丹壩巴旺地小兵單又與金川布拉克底毗連天

氣較他處稍暖而且地方散漫更宜加緊防守以免疎虞俟至明春復行攻勦再前任督臣開泰題

請卽卅承襲土司換給印信經部覆准現已頒發

前來臣等將印暫存司庫統俟金川事竣另行酌

辦奏入報

聞

平定兩金川方畧卷二

欽定四庫全書

史部

平定兩金川方略卷三至五

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷三

乾隆二十九年申申三月壬戌

上諭軍機大臣曰近年金川與附近番寨時相搆釁雖
經該督等屢次摺奏而一切事宜正須面為商議現
派尚書阿桂馳驛前赴四川暫攝督篆阿爾泰俟其
到省交代起程任內一切應辦之事可即告知阿桂
令其接辦在阿爾泰到京面奉指示則回任辦理更

易遵循而阿桂在川既悉情形將來回京籌酌於該
省事務尤多裨益

六月丙申阿桂岳鍾璜奏言臣等於五月內前後
接據西路委員稟稱五月初間金川欲在附近丹
埧之普籠籠地方添脩碉卡當即駕馭丹壩土兵
並撥三雜谷土兵共五百餘名於五月初七日乘
夜攻取金川未及脩完之卡次早金川番人前來
撲奪又被擊退金川傷者甚多又據稟稱小金川

鄂克什兩土司已差人向綽斯甲布商議俟有回
信方能動手而綽斯甲布以上年各土司內惟丹
壩一路依舊會攻餘多爽約不肯訂期現在設法
勸諭臣等伏思上年自夏徂秋各路攻擊金川雖
未克寨摧礮而屢次擊殺似亦少挫其鋒若再乘
此收穫之時四路進攻使之應接不暇藉以擾其
莊稼如此二三年日形彫敝自當機有可乘今之
以番攻番原即為將來犁庭掃穴之地臣等悉心

計議惟有恪遵光明正大之

訓諭先將金川罪在不赦斷不似從前之曲為寬宥致
貽各土司後患曉諭以破其疑并將親立賞格遍
行宣示以鼓其氣且各土司既欲聽命於綽斯甲
布更當設法鼓勵第前此所委皆係微末弁員久
駐其地各土司視為尋常諭導未能得力因令西
路之署副將長清同知崔鑰南路之遊擊宋元俊
同知盛英分路前往各寨并諭工噶諾爾布以新

任總督現奉

欽命來川聞爾綽斯甲布向為衆番領袖出力攻打金
川特為傳諭獎賞至郎卡從前於瀕死之時曲加
寬宥乃不知改悔屢次欺壓鄰封其罪實無可赦
此番務當勦滅斷不肯再留各土司後患爾等能
立首功現在賞賚必什倍於衆土司而將來成功
後

皇上加恩亦定在各土司之上若使始勤終怠郎卡校

猶異常且與爾等結怨已深苟得稍為休息必將
四出擾害爾等强者不能安枕弱者不能自立尚
能與之和好乎其小金川鄂克什梭磨從噶克卓
克采丹壩近日什咱等亦各就伊等情形反覆激
勸并將丹壩近日奪卡得勝情形告以乘此金川
收穫之時齊心奮力或暗放夾壩或明攻碉卡或
聲東擊西或前虛後實務使金川日漸疲敝分令
委員等前往鼓勵并令審察情形先行飛報再現

在正當緊要之時勸諭各土司及時會勸臣阿桂
若即出口恐伊等奔走迎接轉悞師期擬俟大局
稍定於七月間前往巡邊至雜谷地方接見各酋
察其光景再為相機辦理恭請

皇上諭示同日阿桂又奏言臣蒞任後查知今歲二月
間金川番人常在卡外叫喚稱屢次遣人投稟均
為綽斯甲布土司所阻該委員等隨將郎卡所稟
接收詳悉譯看大槩自稱原不敢干犯

天朝惟因衆土司欺凌攻擊奪取穆爾津岡今欲將所
搶丹壩人口什物如數獻還乞飭各土司將兵撤
去至穆爾津岡原係金川之地不能退出等語該
委員差人時諭往返數次堅報不移阿爾泰等以
郎卡既不肯退地飭令嚴加拒絕四月間金川番
人又叫數次亦因其狡詞支飾槩置不問臣思郎
卡通使內地竟為綽斯甲布所阻是各番之仇怨
甚深九土司環攻之舉更為勢不容已第郎卡之

敢於恣肆者不過恃其地險礪堅耳而其所以不敢明肆跳梁者亦知一動大兵不能再邀

恩於格外也前十二三年間番衆疲於奔命懲創甚深是以現在祈求如此但此時既無機會可乘若即聲罪致討曠日持久勞費實有不貲究之金川不過彈丸誠如

聖諭滅之不足以為武衡其大小輕重斷斷可以不必但既有此一番梗化而無所創懲久之諸番必且

生玩褻之心故臣又以為非但此時郎卡未必遽肯退還侵地即令退地求降亦必嚴為擯斥督令各土司等於每歲種植收穫時四面進攻使之農稼無收貲糧罄盡二三年後罷疲不堪然後再以大兵臨之諒無不克若止顧目前之息事而不慮將來之終復生事究非永靖邊疆之長策也茲阿爾泰入覲

天顏自必面陳一切迎邀

聖鑒

臣

此時虛衷諮訪稍有定見即為悉心籌畫奏入

上諭軍機大臣曰阿桂奏綽斯甲布等九土司與郎卡互相攻擊各情形所稱虛衷體察全局機宜不必急於辨理所見甚是至其第一摺所奏將金川罪在不赦傳諭各土司以破其疑等語則未免跡涉張大於現在事理未協在金川等仇讐相尋正如鼠鬪穴中本屬外番常有之事督臣為邊方重鎮即欲相機辦理亦惟不動聲色先勘確情再行斟酌措置方得控

馭大體今遣官前往曉諭綽酋新任總督欽命來川云云又竟明示以出自朕旨特令阿桂為總督專辦此事者然揆諸此時應行籌酌事宜均不免為過當也阿爾泰現在來京請訓阿桂在彼先事悉心熟計藉巡邊以審察其動靜一切務須安詳鎮定坦然行所無事待阿爾泰回任時商榷定局

七月甲申阿桂岳鍾璜奏言臣等於六月內節據委員等稟稱五月十五日綽斯甲布遣放夾壩殺

死金川二人又六月初四日八二十三等日小金川遣放夾壩三次殺死金川男婦六名捉獲六人又初八十三等日梭磨卓克米從噶克丹壩四土司派出土兵兩次攻撲穆爾津岡戰碣俱因碣內已有準備不能前進又據小金川土司澤旺稟稱前被金川捉去今送回之放哨土兵桑噶帶有郎卡書稟內稱前此節經具稟因駐劄丹壩之漢官不收故將桑噶放回稟明情節我自要與丹壩講

和以後安靜居住等語又初五十三等日金川逃出番人格烏彭塔爾資格烏二名逐一研訊據稱郎卡現於各處添修碉卡四路提防番衆不能休息等語查郎卡放回被擄土兵投具書稟並非實有悔過之心不過欲展其惑衆緩兵之計第恐小金川澤旺年老昏憤伊子僧格桑童穉無知墮其術中亦未可定已飭該委員等剴切曉諭毋令為其所惑奏入報

聞

八月癸巳阿桂奏言臣巡查邊徼於七月十八日
抵雜谷腦有綽斯甲布等九土司各遣親信土舍
頭目阿咱拉等迎接請安臣隨傳見示以誠信據
稱我等土司因現與金川對壘不及前來特差我
等請安其合勒金川一事尚求分付臣諭以攻勦
金川原係汝等土司稟知前任總督自願合兵攻
擊若以均係土司而論本不應准汝等合攻但郎

卡屢次侵擾鄰封衆土司公憤所激欲除已害所
以前任總督不為禁止如今聽聞汝等不似初時
齊心努力究竟汝等實在務滅金川抑或郎卡求
和即可退兵息事據頭人等僉稱我等土司實欲
殄滅金川永除後患若從此退兵不過一二年金
川又將生事我等再不得各安生理惟是金川地
險碣堅急切未能攻破而各土司內力量之強弱
不同地方之遠近不等兩年以來我等土兵口糧

艱窘尚求

天朝加恩臣又諭以郎卡如果得罪

天朝自當發兵征討亦不俟汝等懇求今係汝等挾憤私攻思除已害據汝等言務必剪滅金川方免後患但汝等攻打已歷兩年若使遽然歇手豈不盡棄前功為人恥笑此後正當莊稼收割之時回去傳諭汝等土司各自努力果著有功效總督督大人自當別有辦法反覆曉諭量加賞賜遣令回巢

俟督臣阿爾泰回任時臣與熟籌妥計或就現在局勢量為鼓勵進攻以待機會奏入報

聞

同日阿桂又奏言臣此次親至番地訪詢金川近日情形今歲夏間金川一帶地方大雨連綿山水漲發低窪田地多被水淹五六月收穫時又有田鼠之害嚙損禾稼甚多郎卡所部番人雖有數千戶近被九土司攻勦輪流防守亦頗勞苦皆云為

日已長不如與各土司和好而頭人又不敢明言
勸止郎卡惟令各番添修碉卡悉力堵禦自言若
止九土司攻擊尚屬無妨如有漢兵前來另有計
算欲藉此語以安衆人之心臣查自去年構釁以
來綽斯甲布小金川丹堪巴旺各處既有委員駐
守而丹堪巴旺二處又派雜谷腦土兵嚕密土兵
駐扎協防以郎卡之狡獪豈不知內地已有主張
但不肯明言速禍且欲以尚未見棄於

天朝為安慰屬番之計故於各委員前不憚再三具稟而又不肯為乞憐之狀此時祇可聽之再看九土司如何攻擊徐為相機辦理奏入

上諭軍機大臣曰阿桂奏前往番地體察各酋情形摺內所稱郎卡狡獪豈不知有內地主張但不肯明言速禍且欲以尚未見棄天朝為安慰屬番之計所見頗悉酋情狀看來以番攻番自是乘機善策如九土司等果能齊心協勦其勢實有可圖但各土司未經

明白傳諭未免尚存遲疑之見傳諭阿桂俟阿爾
泰回任時會商妥議不必云奉有諭旨但稱欽差總
督之意明諭九土司以郎卡反覆狡詐為衆土司之
害彼雖藉詞欺誑屬番自以為不見棄於天朝然朝
豈肯以衆人之蠹曲為覆庇是以從前請頒印信現在留
存成都不准給發爾土司等集衆往攻原為自除已
害起見欽差及總督控制邊隅不但不為禁制且有
應行獎勵之處決不為之靳惜爾土司等果能殄滅

此酋所有金川之地就各番寨所近即令分晰畫界
管理如此開導土司等既可剪滅仇讐又得增開疆
土自必倍加踴躍其事尤屬易成而於內地不動聲
色鎮靜邊番之道亦深有裨阿桂與阿爾泰即敷行
計議將宣諭後該土司等情形若何據實奏聞

同日阿桂又奏言臣此次巡邊先出維關至雜谷
腦次由茂州疊溪平番松潘漳臘各營協至黃勝
關沿途查看川西沿邊一帶山嶺重複氣候頗寒

兵丁本覺强健又因與諸番錯處相習亦耐勞苦
可稱勁旅再臣前至雜谷腦看得新撫雜谷腦旺
番民三千八百餘戶內共設屯兵三千名頗稱矯
健自脩器械亦尚整齊若結之以恩可為番地有
用强兵奏入報

聞

九月庚戌阿桂岳鍾璜奏言據委員等稱六月十
八二十三七月初三二十九等日小金川遣放夾

壩四次殺死金川男婦十一人捉拿四名小金川
土兵陣亡十餘名七月初九二十四五等日金川
遣人屢至小金川地方偷放夾壩亦互有殺傷又
七月初九日鄂克什撥派土兵由功噶爾拉遣放
夾壩適遇金人放哨之兵正在對敵間經小金川
土兵聞聲赴援協同擊殺金川多人次日金川前
來打仗復被小金川擊敗又六月二十五日革布
什咱派土兵五百名由正地一路進攻生擒布拉

克底番人二名又六月三十及七月十九二十四
二十六七等日綽斯甲布派兵攻搶俄坡穆克等
處均有斬獲臣等飭令各土司嚴飭守卡各番如
有逃來金川番人以及詐稱逃出潛來聽信者速
即拿解聽訊奏入報

聞

乙丑阿桂岳鍾璜奏言據小金川土司澤旺將自
金川逃回之番人阿斯達解省究審訊據供稱本

名阿斯達後改名噶圖卜彭原係小金川僧格宗
人前年逃往金川郎卡給與田地今年五月頭人
舍利斯丹巴布爾資令赴小金川探聽各土司如
何商議并漢兵來與不來行抵布朗郭宗即被拿
獲至現在金川各路防守嚴密周圍添設二百餘
座碉房每座或二三十人或七八十人輪流防守
夏間雨水甚大田被水淹又有鼠雀傷損糧食窮
人無以為生無不抱怨郎卡再金川素不產茶出

鹽亦少今四面不通鹽茶已經斷絕至金川管事
大頭人是布籠普阿什咱薩木丹科爾告策楞溫
布舍利斯丹巴布爾資達克新占五人現在綽斯
甲布雖與金川有親並不差人來往其餘各土司
認真攻打亦無私通金川情事等語查噶圖卜彭
既係差來奸細應請即行正法其澤旺據實查出
解送殊屬可嘉業已酌量獎賞奏入報

聞

同日阿桂奏言竊臣欽奉

上諭蒼旺番民自前此策楞等辦理之後其設立土屯
是否兼隸內地官員管轄抑或另設屯弁管轄並現
在兵制營制若何令臣詳細查明具奏臣查乾隆十
七年雜谷土司蒼旺滋事經策楞等辦理後其雜
谷腦干堡上下孟董九子寨改土歸流業經奏准
將威茂協副將及中軍都司一員帶兵四百名移
駐保縣舊城茂州右營都司一員帶兵三百名移

駐雜谷腦彈壓防守並將瀘寧同知改為理番同知移駐舊保縣承審案件並徵收番糧六百餘石又於各寨番民內酌設屯兵三千名設立土都司守備三員屯總五名及大小總旗等項頭目分隸管束其軍器等項俱照向日所習聽其自備平時力作傭工不支糧餉遇有調遣照土兵之例支給守糧亦不定期操演惟令該協於每年秋間點驗一次如有衰弱裁汰另補至各土弁仍聽該管文

武統轄嗣乾隆二十三年原任督臣開泰請於錢局加外鼓鑄餘息銀內酌撥七百餘兩分賞管轄屯兵之頭目等七十七員以資養贍又酌撥銀二百四十兩買備烟茶牛隻於僉兵之時分賞以示鼓勵現在遵照辦理規制尚屬妥協惟是臣此次巡邊查得各寨番民常在該管文武衙門聽候差遣而預備夫馬為數頗覺過多已嚴飭該協丞減去十之八九酌定數目移咨提督存案永除額外

差派以仰副我

皇上加惠邊番至意奏入報

聞

癸酉阿桂阿爾泰岳鍾璜奏言綽斯甲布等九土
司會攻金川一案屢奉

諭旨令臣阿桂藉巡邊以察其動靜俟臣阿爾泰到川
熟籌妥辦昨臣阿爾泰入

覲仰蒙屢次

指示無微不至茲臣等公同商榷竊以郎卡所恃者不過地險礪堅然合計衆土司之力較金川多至數倍若果奮力環攻即未能責効於旦夕要可望其有成是以番攻番實為鎮靜辦理之善策但既用各番之力必須體察各番之情查九土司內巴旺革布什咱地小兵單只可以牽制一隅鄂克什不與金川接壤且亦兵力單微不過附於小金川為一旅之助其梭磨從噶克卓克采力量雖大但地

勢遙隔羊腸鳥道進攻頗難又丹壩一部番戶無
多日久不無踈懈惟小金川綽斯甲布屬番衆多
兵力強盛堪與金川為難小金川從前仰賴

天朝覆庇不至為金川吞并此番攻打金川頗屬盡心
出力而綽斯甲布處處與金川連界進攻頗易其
已故土司策卜丹巴勒珠爾之土婦即係郎卡之
姊誼屬郎舅該土司故後因其子年幼土司印務
隨委故土司之兄土舍工噶諾爾布管理今故土

司之子亦經病歿看來此次攻打金川該土舍亦無私通金川之意如果綽斯甲布等各思努力則金川小醜實有可圖第攻守之勢既異要非持之以久使金川漸就疲敝難冀成功又恐金川疲而衆土司之力不能不與之俱疲必須時為策勵酌加賞卹以致其奮往務於每歲金川種植收穫時併力環攻使之四面應接不暇至於時常攻襲惟在相機而進俾各土兵亦得稍事休息庶為有益

臣等酌議明年各處土兵進攻緊要時量給口食之費並照現在賞例其有割獲首級耳記及陣亡受傷者量予賞卹庶各部番兵可期得力奏入上從之是日阿桂等復奏言接奉

諭旨令將郎卡應行殄滅及各土司如果勦滅金川分地獎賞之處作為臣等之意曉諭綽斯甲布諸酋臣等已欽遵辦理奏入亦報

聞

十月甲辰阿爾泰岳鍾璜奏言綽斯甲布等九土
司會攻金川情形查綽斯甲布一路於八月初一
至九月十三等日派撥土兵進攻金川穆康寨儒
錫寨日旁後山寨金川亦於八月初六九月初四
等日赴綽斯甲布地方暗放夾壩並攻甲索格江
寨嘉覺寨俄坡寨婁里寨綽斯甲布拒敵殺傷金
川多人并割獻首級耳記搶獲鎗矛騾馬又攻克
金川水磨九座綽斯甲布土兵亦傷亡衝失三十

名丹壩一路於八月初九以至二十等日丹壩同
三雜谷土兵或搶金川凱立葉牛廠或攻博迪喇
嘛寺等處踐踏莊稼而金川亦赴丹壩之博噶古
及梭磨從噶克卓克采各營盤偷放夾壩互相擊
殺金川番人殲死者甚多丹壩土兵亦傷損二十
餘名小金川一路於八月初三等日在金川鄂碩
覺木達關多葛爾等處捉獲男婦數名并獲騾馬
牛隻鎗刀衣服等項土兵帶傷五名革布什咱一

路八月十八日派撥土兵至金川郭察地方打仗
革布什咱土兵內傷頭人一名土兵五名臣等當
即隨時酌量給賞並諭各委員仍舊駕馭鼓舞設
法進攻再小金川土司澤旺稟稱八月二十三日
有自美臥溝逃出金川番民斯達克塔爾磋摩兩
戶男婦十五名口又委員陳良彥等稟稱八月二
十八日有金川番民阿咱納塔爾等男婦三名口
逃投丹壩又據委員等稟稱九月初六日有金川

番民扎斯嘉等男婦三名口逃至綽斯甲布又九月初七日有金川番民班第母子二名逃投小金川詰問金川情形僉云金川年成荒歉各處添修碉卡日夜防守番民甚是窮苦與前此逃番所供約畧相同臣等當諭該管官飭令土司將逃番安置寬遠之處以防其潛通信息如有空間田地酌量撥給安插務使金川番衆聞知咸思遠害投生以廣招徠之法庶將來各土司攻襲更易為力奏

入報

聞

十二月丙戌阿爾泰岳鍾璜奏言臣等欽遵

諭旨指示機宜令臣等會給九土司諭稿委員分發今據委員稟稱親抵各土司諭穴傳示檄諭且駕馭鼓勵量為犒賞該土司土舍頭目人等俱感激踴躍或奮欲勦掠以圖復仇或亟圖攻取思除後患委員等目睹小金川丹壩三雜谷綽斯甲布等土

司派撥頭人土兵分路前赴金川地界明擊暗攻
並將攻劫搶掠情形稟報前來臣等查各土司近
日攻勦金川屢經得勝金川勢必力圖報復正不
可不嚴密防範臣等飛飭綽斯甲布革布什咱巴
旺等土司各於要隘添兵防守並於路通金川之
處設伏巡警如有金川舊衆前來便於奮力截殺
奏入報

聞

平定兩金川方畧卷三